

知歸集

向晚抑鬱作詩一首贈師 時師疑癌症

也看薤露蘊光華，何意逃歡餐菊霞。曠劫卻將詩鍛鍊，婆娑樹下一拈花。

向晚感事

青春蕪蔓等閒芟，難挽星河洗骨凡。花與時光雙折墜，書隨記憶一封緘。
街衢深處衰眸耳，雲靄迷間老布衫。舊事懶談詩可想，不禁夢語自喃喃。

弟赴考未果感作

迷局途乖舛，前行望指津。波瀾神意旨，祈禱夢悲辛。
時失仍循道，功虧莫問因。難煩歸一睡，不作眼明人。

李師醉紅小酌招飲賦謝

容易春風數舊年，相看執手一酡然。在杯情誼醇於釀，掛壁龍蛇采勝筵。
已慣死生隨聚散，懶從疫癘計虧圓。成章小子當狂簡，吾黨酒詩追昔賢。

姚公招飲晶華二首

從來令譽晚相知，深誼欲酬唯賦詩。妙語祛寒歡一座，懸燈暈彩酒千卮。
真逢慷慨能清眼，始信風流可療飢。剪罷子衿兼畔草，青青持贈染華絲。

其二

久感襟期獎後生，喧囂樓外隔重城。奇觀鐵板烹鮭菜，且縱心猿蕩酒兵。
懷抱凌霄猶倜儻，詩文迭代自崢嶸。人間何是真天籟，雛鳳聲偕老鳳聲。

烏來名湯泡湯感作

微雨迷天溪欲歌，煙嵐纏鎖玉嵯峨。湯澆功過三千慮，身忘晨昏九五科。
漱石他山峰跌宕，枕流我意樹婆娑。淋漓風與神俱眩，坐掬韶華溢指多。

過鼓山漁市

千燈錯彩落西灣，焉忍青春筆一刪。漁市腥囂俱渺渺，鼓山情緒漸斑斑。
命緣如月盈虧又，人事隨潮往復間。淪茗風流空遠矣，新樓不復燕歸還。

師大道中以「一初衷」勉諸生二首

紅樓霞照淡朦朧，釀我詩情晚愈工。世局如棋翻手覆，青春莫任一初衷。

海隅花好為誰紅，忍看國家無有中。心性此生真大業，傳燈唯遞一初衷。

碧潭

萬象人間百覓尋，虹橋佇望雨中深。春波依舊兒時碧，難洗胸膺壘塊心。

壬寅立夏詩會感作二章

人面於今兩不同，騷壇依舊望春風。淡江任爾纏綿雨，都付回眸寵辱中。

上庠真感十年恩，師友死生誰復論。一雨宮燈催落寞，綠肥紅瘦了無痕。

淡江道中

雲山若墨雨如梳，渲入淡江望卷舒。年少詩情甘一洗，不憑世道任乘除。

西瓜

碧綠天光合，凡塵一洗新。燠寒知道味，寵辱見情真。

剔透宜冰盞，邈綿重早春。生生經造化，豎子亦為仁。

讀李漁叔、汪中遺墨

海嶠風流早殞天，徒從手稿辨前賢。詩情破紙堪冲斗，墨誼封塵許忘年。

未必人間唯寵辱，何嘗月下不虧圓。浮槎瀛外真名士，落帽重陽一惘然。

晚步懷烏克蘭事

晚霽天如拭，溪蛙雨後歌。燈迷知路蹇，月缺在山多。

人境仍常歲，心濤久未波。唯祈春靜好，老不識干戈。

重返藥樓

莫辨來時路，十年返藥樓。風騷嗟略盡，冠蓋散何求。

舊誼餘流水，高情自小舟。周璇聽枕上，招夢碧潭秋。

清明連假修整小園

雨收花已散，春去夢難回。園色雖相似，年光暗自催。

爭迎新薜荔，誰識舊玫瑰。天地無情甚，方能不老哉？

業師有和，次韻並望慰之

曾是花繁又綠蕪，焉從聚散辨前途。生如橄欖天如碾，苦到甘回足有愉。

壬寅掃墓

雲山看盡有荒蕪，大道之行豈坦途。死蔭還需親走過，淚於誠摯亦恬愉。

過烏來纜車適逢維修

真似凌空御氣飛，峻嶒碧巘賸依稀。橫天捷徑雲嵐鎖，坐檻真心利慾圍。
直道窮何身培懍，舊游望罷夢希微。如濤萬木搖清冷，遲暮嗟吟胡不歸。

讀劉太希詩書後

乍說春來冬復還，清明微雨洗青山。扁舟一夢浮沈外，尺蠖半生伸屈間。
詩到癡時餘落寞，筆耕癡處諱悠閒。無涯悲憫歸圓澈，或在了通生死關。

女友戲我金牛座

無涯大塊樂探尋，故紙堆中書路深。我性如牛耕筆慣，勤非名利在齋心。

臺大流蘇盛開

飄搖飛雪向陽開，始感春心款款回。夢想欲成花爛漫，還從芥種細澆培。

偶感

勞形漸忘少年痴，書讀深來久廢詩。渾看身姿衰腴肉，童心應保似當時。

戰火

貴賤於茲等草蒿，是非味盡始兵鏖。寡民自有生存理，不任豪強一俎刀。

疫情嚴峻過貓空站竟無人煙感賦

無端疫癘毀勞生，憂惴相逢誨效聲。野市蕭疏喧以默，昊天層疊曠何明。
重來風色非前度，唯有蟬心勝舊情。跌宕林巒青洗目，權忘虎口苦營營。

夜雨金瓜石飲茶

世情巖壑兩蜿蜒，燈火含潮夜可憐。久陷愛嗔難惜分，一迷得失不知年。
襟懷隔雨潺潺冷，歲月隨茶寂寂煎。剝復人間猶沸沫，烹成壺盞裊輕煙。

蟄居

詭譎風雲變，蟄龍潛海隅。炎涼橫瘴癘，生死繫膏腴。
不戢凌天翼，焉謀濟世圖。昂然及時雨，願洗萬心蘇。

暫寄博士後

連朝冷雨漫霏霏，洗盡前塵臭穢非。繞樹飄零欣有託，攀雲翻覆願無違。
情才炳煥輕招謗，興味沈潛自息機。龍戰阨窮猶尺蠖，待時還作九霄飛。

和詩友岸洪

鯤鯨早疫苦相仍，君去雲山路幾程。一海風波回過雁，萬華歌舞病流鶯。

纏綿情共詩方久，慘澹夜隨眸愈明。聚散天涯何足道，楓紅載酒再從行。

文山眺望

名韁脫盡道心寬，積翠春殘未減寒。煙濕山光成意境，曉浮花氣動情瀾。
風行不偃談容易，雲滅常澄做大難。回眺城南非與是，都歸袖手等閒看。

謀教職未果

性本沈冥與世疎，青雲歧路復何如。逆風殃及傷弓鳥，汲水恩生煦沫魚。
天鑒初衷甘毀譽，棋當殘局惑盈虛。仙真無處非遊戲，也笑鵲城莫卜居。

觀奧運閉幕式

旗濤神采共飛揚，萍水分歸天一方。伏櫪壯心曾蹭蹬，凌雲雛鳳始翱翔。
懷君夙昔身堅毅，饋我如今夢激昂。契闊欲酬焉鬻臂，康強無處不徜徉。

觀奧運羽球賽事

撼頓誠疑地軸摧，萬聲呼動震奔雷。逆流時局驚翻覆，破浪鋒頭險往來。
勝負無關矜態度，縱橫徒賸鬱崔嵬。英雄際會知風骨，指日崢嶸逼斗魁。

庚子疫博論口試後作

百鍊濫竽充士林，物華疫癘兩駸駸。荒唐淡處歡愉寡，惆悵濃時悔吝深。
黍夢流金休更掬，年光勝酒不堪斟。霞燃鳳樹花如火，燒徹人間機巧心。

臺灣府孔子廟學碑記讀後

天降斯文任道鳴，摧頽棟宇煥崢嶸。臺員禮樂崇多士，聖哲彝章備大成。
世變早亡風雅頌，心盲遑識草真行。名山真感衰薪火，願遞餘輝照後生。

重修關帝廟碑記讀後

血戰神州恨未伸，冷看人事轉洪鈞。河山送斷新戎主，海嶠凋零故漢臣。
欲化恣睢成義烈，為圖反逆作良淳。復誰秩祀尊鵬舉，慎辨天朝偽與真。

重修海會寺碑記讀後

勳業南明指顧中，榱椽毀作梵王宮。瘴鄉迷苦歸無上，象教崇宏渡海東。
汨沒潮聲殘跡址，婆娑洋界舊春風。興亡閱盡關天數，盡付鯤鯨晚照紅。

咖啡

繾綣香醇出遠林，杯中風雅自知音。枯榮由命烹濃淡，甘苦隨天焙淺深。
點染煙雲半山雨，沖調情韻故園心。瘡痍栽就千紅豆，曾是農人淚滿襟。

假新聞

君子三端避，危言可亂邦。螢屏天入掌，世道蟻浮缸。
慾海隨翻攪，心猿任謫降。有睛人亦瞽，真假付滄江。

試茶

錯落雲端別遠讒，千叢翠碧繞溪巖。涵濡雨露春兼萃，妝點星輝夢合摻。
盞裡溟濛山跌宕，舌尖恍惚雀呢喃。滿鑿宜最天河水，苦盡餘甘洗俗凡。

過四草大橋

疊雲燒火權歸村，曾幾灘音入夢魂。琵琶鯤鮓秋白月，漁燈舢舨夜黃昏。
天來爽氣酬詩骨，橋撼驚波鎮海門。人事回眸真磧礫，新潮漲覆舊時痕。

畢業在即感謀事不易

荊山玉抱日兢兢，世道維艱甚履冰。欲潤文章酬膽赤，難沽風骨換眸青。
江湖久溺泅無力，勢利重圍突未能。長曠昊天遮遠目，迫人胸次斂嶒稜。